

Fungsug Baenzgya Mulajucz

□ Maj Veiungz comz hoiz



▲ Bawxmoq okdou.

◀ Laex baenzgya Mulajucz hoengghwd nauh-yied.

Lozcwngz, daengx guék aen Mulajucz swciyen dog, gij vwnzva giekdaej minzcuз de gig naekna. Ndawde, gij fungsug baenzgya Mulajucz gvaq baenz geij cien bi daengz seizneix cungj lij mbouj bienq.

Bouxcoз Mulaj guhyoux cungj gig swyouz, gyoengqvunz cawzok ciethaiq, hoihcomz caeuq ganjhaw ndaej doxgyau doxrox, seiz "byaij ndoi" lij doiqfwen gyau baengzyoux dem. "Byaij ndoi" itbuen youq ndwensam caeuq ndwenbet, bouxcoз ndang daenj buhvaq gyaunde, bae gwnz haw ra doih doiqfwen. Aeu fwen guh moiz, mwngz cam gou han, song boux cungj habhoz couh soengq doxgaiq hawj baihde. Doeklaeng couh cingj bouxmoiz bae daengz ranz bauq hawj bohme, dingh ngoenzndei baenzgya. Baih bouxsai cingj bouxmoiz bae ranz bouxmbwk cam gonq. Danghnaeuz bohme bouxmbwk hab'eiq couh dawz gij betcih lwgmbwk hawj bouxmoiz gyau hawj baih bouxsai. Bohme bouxsai dawz betcih bouxmbwk daenz youq baihlaj lozyieng. Danghnaeuz youq sam daengz gouj ngoenz ndawde, gyanghwnz duzgaeq mbouj luenh haen, mbouj sawqmwh luenh

mbin bungq doxgaiq vaih daengj, couh cingj canghsuenqmingh daeuj "hab mingh". Danghnaeuz betcih mbouj hab, baih bouxsai couh dauq doiq betcih ma, betcih doxhab cix ndaej roengzdingh lo. Seizde baih bouxsai aeu soengq song gaen nohmou daengz ranz bouxmbwk bae "raeuj vaen", youz bouxmoiz caeuq song ranz yaengdingh. Daengz ngoenz dinghvaen, baih bouxsai couh dawz bet gaen nohmou, song duz gaeqdon, song huz laeuj, ngaenzlaex bae ranz bouxmbwk. Doeklaeng gyoengqde couh cingj canghsuenqmingh yawj ngoenzndei dingh ngoenzlaeuj, caiq lingh senj ngoenzndei hwnj haw bae caeuq bouxmbwk cawx baengz guh buhmoq. Bawxmoq okhaq ndwen gaxgonq, cib dahsau doengzban ndaw mbanj couh gagnyienh bae guh yahbuenx, bae ranz bawxmoq bang guh haizmoq, nyib buhhaq daengj. Daengz ngoenz okhaq, cib cejnuengx caeuq bawxmoq cang ndang doxdoengz liux bae, caeuq bawxmoq itheij bae ranz lwggwizmoq. "Cib cejnuengx soenghaq" couh dwg gij fungsug baenzgya Mulajucz ndawde aen yizsiz daegbied ndeu.

Haujlai dieg youq ngoenz coux caen lij laeb "dou fwen". Couhdwg baih bouxsai yaek cieп bawxmoq aeu eu fwen hoizdap cij ndaej haeuj ranz bouxmbwk bae. Baih bouxmbwk gyoengqvunz soengq caen bae daengz mbanj bouxsai caemh yaek eu fwen hoizdap cij ndaej haeuj ranz bouxsai bae. Bawxmoq haeuj ranz le, lij aeu "nauh dangzfwen". Couhdwg youq baihdaw baihrog rugmoq nda daiz doxdax eu fwen. Sing hemq ndei, sing angq riu goksatsat, nauhyied oen' oen. Ngoenz baenzgya, song bouxmoq aeu buenx bouxhek caeuq beixnuengx gvaq haemh. Ngoenz daihngieh, bawxmoq couh riengz gyoengqvunz soengq caen ma ranzmeh youq. Ngoenzsix ndwenngieh bi daihngieh, bouxsai cij bae cieп bouxmbwk ma gvaq ciet, ngoenz daihngieh bouxmbwk youh dauq ma ranzmeh lo. Baez naengz daengz seizhong, bawxmoq cij ma ranz bouxsai youq geij ngoenz bang guhhong, daengz mizndang seng lwgnyez le cij mbouj dauq ma ranzmeh youq.

Bi 2012, fungsug baenzgya Mulajucz ndaej senj haeuj Gvangjsih buék daihsam feihvuzciz vwnzva yizcanj mingzloeg.



▲ Cib cejnuengx buenx haq ndangdaenj doxdoengz.



▲ Cib cejnuengx youq bakdou bawxmoq doiq fwen.



▲ Aendoih soengqcaen rap doenghyiengh "vahoengz" riengz-laeng.



▲ Bawxmoq bae daengz bakdou ranzgvn.



▲ Bawxmoq hamj hoengz haeuj ranzgvn.



▲ Bawxmoq baixsax goengcoj ranzgvn.



▲ Cib cejnuengx buenxhaq.